



Universitätsbibliothek Paderborn

**R. P. Lucae Pinelli Societatis Jesu Theologi, De
Perfectione Religiosa, Et Obligatione, Qvam Qvisque
Religiosus ad eam consequendam habet. Libri Quatvor**

Pinelli, Luca

Mogvntiae, 1604

XVII. Religiosum debere perfectionem acquisitam conseruare, & de modo
eandem conseruandi.

[urn:nbn:de:hbz:466:1-46699](#)

inimicos & aduersarios, nunquam securus esse potest, nisi è medio illos sustulerit; sed necesse non est, ut uno momento, vel simul omnes, tollat & extirpet, sic Religiosi inimici sunt passiones, quæ quotidiè illi rebellant, eas si non potest uno tempore simul omnes, conetur tamen aliam post aliam expugnare, & sic tendet ad maiorem perfectionem. Similiter regnum non inuaditur vniuersum simul, sed nunc arx aliqua eius ab hoste eripitur, nunc vires aliqua occupatur, & sic deinceps aliae atque aliae, donec totius regni possessio adeatur. Non secus religiosus, cui in votis est regnum perfectionis inuadere, nunc hanc, nunc illam virtutem acquirere debet, & hoc est quotidiè ad maiorem perfectionem anhelare. Itaque nulla ratione deiici animo debet, si non una actione alterauè fiat summè perfectus. Satis in itinere progreditur, qui nusquam in via hæret.

Religiosum debere perfectionem acquistam conseruare, & de modo eandem conseruandi.

CAPUT XVII.

G 2

Fili

FILI, parum prodest corporis valetudini restitutum esse, si postea per intemperantiam vietus aut incuriam aliquam iterum laedatur. Immò relapsus in morbum, solet ipso morbo esse periculosior. Eadem ratio est de perfectione spirituali, quæ parum semel parta prodest, si vitio custodiae & vigilantiæ nostræ rursum excidat. Et si relabi in corporalem ægritudinem tanti aestimatur, propter discriminem, vitæ temporali impendens; multò pluris reformidanda erit relapsio in imperfectiones veteres, propter periculum vitæ spiritualis. Fili, vis immunis esse à periculo moriēdi spiritualiter fugere ea, quæ ad mortem illam disponunt. Experientia certè quotidiana discimus, eos qui semel studio perfectionis nuntium remiserunt, in mille defectus impingere, & in tantam morum laxitatem, animique impudentiam deflectere, ut non modo remoto omni pudore multa parum laude digna committant, sed etiam glorientur & exultent in suis lapsibus. Qua in re non sunt dissimiles illis angelis, qui cælo delapsi, cum ruina grauissima omnium spiritualium donorum iacturam fecerunt, & dirissima mala in suū caput arcessuerunt: nam quo erant sanctitate dignitateque omnibus creaturis excell-

len-

lentiores, hoc ruendo de cælorum fastigio facti sunt omnibus creaturis deteriores & viliores. Apostolus quoque qui me prodidit, ex Apostolatus dignitate, delapsus est in præcipitium desperationis. Idem euenit religiosis, qui quò ex elatiore perfectionis gradu labuntur, hoc ruinam tristiorum faciunt, & peiores fiunt. Atque ut beatus appellatur, qui declinando à malo, consecatur bonum, sic contra miser est & infelix, qui deserta perfectionis via, amplectitur vitam dissolutam & vagam.

A d conseruandum autem perfectionis gradum, quem acquisiuisti, duæ virtutes tibi adminiculo esse possunt, amor & humilitas. Amor reddet te vigilantem, ut immunitis sis ab incursu prædonum. Humilitas autem illum conteget & occultabit, ut in oculos illorum incurrere non possit. Quàm salutaris sit in hanc rem amor, non est difficile demonstrare. Homo diues & copiosus, qui opes suas non amat, citò eas perdit. nā qui non amat rem aliquam, non æstimat, qui autem non æstimat, nec custodit. nemo autem ignorat rem negligenter custoditā, facile perire. Haud secus necessarium est, ut religiosus magno amore perfectionem semel partam prosequatur: ex amore enim

G 3 nasce-

nasceretur formido eā amittēdi, ex formidinē autē solicitudo & diligentia eā custodiendi. Solicitudo verò facit, ut inueniantur media necessaria vel utilia ad finē consequendum.

Quisqvis solicitudine tenetur conservandæ sanitatis corporalis, primò consulit medicos expertos & bonos, vescitur cibis salutaribus, stata in comedendo seruat tempora, congruentia non negligit corporis exercitia, habitationē deligit, in loco salubri, & à medicis probato. Tuetur se ab imbris, ventis, cæterisq; externis incommodis. Breuiter, cauet diligenter ne aliqua in re exceedat, vel nocumentum aliquod faciat. Idem in religioso efficit solicitudo, si desiderio perfectionis conseruandæ teneatur, & salutem animæ querat. Primum enim cauet ne arbitratu suo, vel sociorum laxiorum consilio vitam instituat, sed potius ex Superiorū, Patrumq; spiritualium directione. Deinde ut cibis bonis vescatur, nempè iis, quibus ego usus sum, dum viuerem in terra, hoc est, ut perficere in voluntatem Patris mei, qui in calis est, cuius voluntas est sanctificatio animæ nostræ. Quare quicquid nobis Deus confert ad animę sanctitatem faciens, optimus est cibus, sicut contra quicquid ad fæditatem animæ facit, hoc est, peccata, pessimum

mum venenum est. Deinde exercitationem
virtutum non negligit. Cum enim perfectio
fundata sit in caritate, quae similis est igni, in
quem si iniiciantur ligna, crescit, si subtra-
hantur, extinguitur: ita quod religiosi cari-
tate praediti plus se in virtutibus exercent,
eo in perfectione amplius proficiunt, quo
minus, hoc plus de perfectione discedit, ac
proinde omni exercitio sublato tandem ex-
tinguitur. Quod ad locum salubrem atti-
net, in quo conmorandum est, saluberrimus
est religio ipsa, in qua religiosum collocaui:
si autem particularia loca spectemus, optimus
est in quo a medicis spiritualibus collo-
catur. Quod si occasiones quoque omnes
labendi in aliquas imperfectiones effugiat,
satis se muniet & tuebitur contra omnes
difficultates externas. Denique nullum com-
mittit excessum, quia in omnibus rebus du-
biis perfugium habet ad suum Patrem spiri-
tualem, & sanctæ moderationis sale suas
pœnitentias & mortificationes condit.

ALTERVM, quo conseruatur perfectio,
est humilitas. Qui gemmam preciosam na-
ctus est, tria cauet, ne aliquando eam amit-
tat. Primo, in abditum locum eam recludit,
ne facilè à quouis videri vel inueniri pos-
sit. Secundo, non quibuslibet hominibus ea

visendam præbet , nec facilè apud quosvis
gloriatur se illam habere. Tertiò, nec di-
uellit eam à re, ex qua pendet. Exempli cau-
sa , calor aquæ pendet ab igne. si autem a-
quam ab igne remoueas, perdit calorem.
Humilitas in religioso , cui studium perfe-
ctionis gemmæ loco est, medetur omnibus
his tribus periculis. Primò enim efficit, vt
suas virtutes, & perfectionem alios celet, &
modestia pallio quasi contegat. Deindè, vt
non solùm non iactet & ostentet spiritales
suas opes, verùm etiam reputet se eis indi-
gnum , & verò etiam ingenuè confiteatur
se esse pauperem, mendicum, & seruum in-
utilem. Tertiò & postremo , vt agnoscat
perfectionis gemmam pendere ex mea gra-
tia, sciens, eam, si ab ea separetur, amitti. Si-
cut enim ego superbis resisto, sic humili-
bus gratiam impertio. Itaque si velis perfe-
ctionem tuam non modo conseruari,
verùm etiam crescere, da ope-
ram veræ humilitati.

PRIMI LIBRI FINIS.

LIBER